

Rex, Byzantii gubernator, circumspicere cœpit, quo consilio, qua arte, quibus viribus commissum sibi tueri posset Imperium. Apparebat præter Venetos neminem esse, a quo subsidia ulla sperari possent. Continuo igitur & ipse, & Theophilus Zenus, qui per id tempus Byzantii Prætor erat, ad Tepulum Ducem mittunt, qui eum doceret de novo duorum potentissimorum Principum fœdere, qui vulgo dicerentur, in se arma comparare: opus proinde esse novis auxiliis, & in primis celeritate, cujus maxima esse soleant in bellis momenta: dicere, se pro comperto habere, utrumque in magno apparatu belli esse occupatum. Maturarent igitur Veneti opem ferre, si sibi Byzantium defensum vellent: nec auxilia tantum, sed ea etiam expedirent, quæ ad arduum bellum sustinendum necessaria crederentur. Nec cunctatione opus esse: ne si, quod nollet, hostes subito incursum opportuna gerendo bello loca præoccuparent, suis sociorumque rebus perditis, quum vellent, subvenire non possent. Haud ociosis auribus eum civitas accepit nuncium, rei periculo commota: continuo igitur classem decernit non parvam. Quinque & viginti triremes paucis diebus instructæ, Leonardo Quirino & Marco Gufonio Præfectis portu eductæ, celeri navigatione Byzantium petebant, quum nunciata est interim urbis obsidio; valida hostium classis circa eam esse dicebatur. Tum eo nuncio perculsi triremium Præfecti, majore quam antea studio, ne quid interea mali urbi accideret, Constantinopolim ire pergunt. Præerat hostium classi Leo Gavala, homo rei maritimæ non ignarus. Is, audito Venetorum adventu, mutata statione, eo classem applicuit, ubi terrestres copiæ (nam a continenti quoque jam urbs oppugnari cœperat) castra habebant. Sed nec id quoque hostium consilium Venetum a congressu deterruit, quin sub ipsum statim appulsum ferociter in Græcam sit classem inductus. Quod ipsum tanto ardore dicitur factum, ut momento temporis quatuor & viginti triremes, reliqua classe disjecta, in ipso tumultuantium hostium conspectu oppressæ sint. Victor Venetus in urbem obsidione levatam ingressus, ingenti

*Exagona-
rum classis
ante Byzan-
tium a Ve-
neris profligata.*